

賣登三萬。既而密伺買者徵其由。乃昭應縣之御馬廐。股者死三歲矣。斯吏不時除籍。官徵其估。計錢六萬。設其以半買之。所獲尚多矣。若有馬以備數。則三年芻粟之估。皆吏得之。且所償蓋寡。是以買耳。任氏又以衣服故。敝乞衣于峯。峯將買金綵與之。任氏不欲。曰。願得成制者。峯召市人張大為買之。使見任氏。問其欲。張大見之。驚謂峯曰。此必天人貴戚。為郎所竊。且非人間所宜有者。願速歸之。無及于禍。其容色之動人也如此。竟買衣之成者。而不自緝縫也。不曉其意。後歲餘。鄭子武調授槐里府果毅尉。在金城縣時。鄭子方有妻室。雖晝遊於外。而夜寢於內。多恨不得專其夕。將之官。邀與任氏俱去。任氏不欲往。曰。旬月同行。不足以為歡。請計給糧餼。端居以俟。歸。鄭子懇請。任氏愈不可。鄭子乃求峯資助。峯與更勸勉。且詰其故。任氏良久。曰。有巫者言。某是歲不利西行。故不欲耳。鄭子甚惑之。不思其他。與峯大笑。曰。明智若此。而為妖惑。何哉。固請之。任氏曰。儻巫者言可徵。徒為公死何益。二子曰。豈有斯理乎。懇請如初。任氏不得已。遂行。峯以馬借之。出祖于臨臯。揮袂別去。

信宿至馬嵬。任氏乘馬居其前。鄭子乘而居其後。女奴別乘。又在其後。是時西門圍人。教獵狗于洛川。已旬日矣。適值於道。蒼犬騰出于草間。鄭子見任氏歛然墜於地。復本形而南馳。蒼犬逐之。鄭子隨走。叫呼不能止。里餘。為犬所獲。鄭子銜涕。出囊中錢贖以瘞之。削木為記。迴視其馬。嚼草于路隅。衣服悉委于鞍上。履襪猶懸於鐙間。若蟬蛻然。唯首飾墜地。餘無所見。女奴亦逝矣。旬餘。鄭子還城。峯見之。喜迎。問曰。任氏無恙乎。鄭子泫然對曰。歿矣。峯聞之。亦慟。相持于室。盡哀。徐問疾。故。答曰。為犬所害。峯曰。犬雖猛。安能害人。答曰。非人。峯駭曰。非人何者。鄭子方述本末。峯悲訝歎息。不能已。明日命駕與鄭子俱。適馬嵬。發瘞視之。長慟而歸。追思前事。唯衣不自製。與人頗異焉。

申宗傳

孫頤

開元中。前進士張佐。常言少年南次鄆杜。郊行見有老父乘青驢。背鹿革囊。顏甚悅懌。旨趣非凡。始自斜逕合路。佐甚異之。試問所從來。叟但笑而不答。至再三。叟忽怒叱曰。年少子乃敢相逼。吾豈盜賊遁埋者耶。何必知

從來。佐遜謝曰。嚮慕先生高躅。願從事左右耳。何賜深責。叟曰。吾無術教子。但壽永者。子當唾吾。潦倒耳。遂復乘促走。佐亦撲馬趁之。俱至逆旅。叟枕鹿囊。寢未熟。佐乃疲。貰白酒將飲。試就請曰。筆瓢期先生共之。叟跳起曰。此正吾所好。何子解吾意耶。飲訖。佐見翁色悅。徐請曰。小生寡昧。願先生賜言。以廣聞見。他非所敢望也。叟曰。吾所見梁隋陳唐耳。賢愚治亂。國史已具。然請以身所異者語子。吾宇文周時居岐。扶風人也。姓申名宗。慕齊神武。因改宗為觀。十八從燕公子謹。征梁元帝於荊州。夜夢青衣二人謂余曰。呂走天年人。向主壽百千。吾乃詣占夢者於江陵市。占夢者謂余曰。呂走迴字也。人向主住字也。豈迴住乃壽也。時留兵屯江陵。吾遂陳情於校尉拓跋烈。許之。因却詣占夢者曰。住即可矣。壽有術乎。占者曰。汝前生梓潼薛君。肖也。好服食。多尋異書。日誦黃老一百紙。徙居鶴鳴山下。草堂三間。戶外駢植花竹。泉石縈繞。八月十五日。長嘯獨飲。因酣暢大言曰。薛君。肖疏澹若此。豈無異人降旨。忽覺兩耳中有車馬聲。因巖然思寢。頭纔至席。遂有小車朱輪青蓋。駕赤犢。

出耳中。各高二三寸。亦不覺出耳之難。車有二童。綠幘青幘。亦長二三寸。憑軾呼御者。踏輪扶下。而謂君曰。吾自兜元國來。向聞長嘯月下。韻甚清激。私心奉慕。願接清論。君肖大駭曰。君適出吾耳。何謂兜元國來。二童子曰。兜元國在吾耳中。君耳安能處我。君肖曰。君長二三寸。豈復耳有國土。儻有之。國人當盡焦螟耳。二童曰。胡為其然。吾國與汝國無異。不信。請從吾遊。或能便留。則君離生死苦矣。一童因傾耳示君肖。君肖見之。乃別有天地。花卉繁茂。叢棟連接。清泉縈遶。巖岫杳冥。因捫耳投之。已至一都會。城池樓堞。窮極壯麗。君肖彷徨。未知所之。願見向二童。已在側。謂君肖曰。君既至此。盡從吾謁蒙元真伯。蒙元真伯居大殿。牆垣階陛。盡飾以金碧。垂翠簾帷帳。玉童四人。立侍左右。一執白拂。一執犀如意。二人既入。拱手不敢仰視。有高冠長裾。綠衣人。宣青紙制曰。肇分太素。國既有億。爾淪下土。卑賤萬品。聿臻於此。實由冥合。況爾清節躬誠。叶於真宰。大官厚爵。俾宜享之。可為主籙大夫。君肖拜舞出門。即有黃幘三四人。引至一曹署。其中文簿多所不識。每月亦無請受。